

蜀

水

經

蜀水經卷之十二

京山李元太初

漢水

漢水源出陝西寶雞縣大散關之陽

西漢水漢書曰隴西郡西縣嶠冢山西漢水所出南  
入廣漢白水縣東南至江州入江過郡四行二千一  
百七十里通典曰秦州上邽縣嶠冢山西漢水所出  
經嘉陵曰嘉陵江經閬中曰閬江雍大記曰西漢水  
在西和縣源出嶠冢山西流與馬池水合地理今釋

日鞏昌秦州西南六十里麟冢山西漢水所出水經  
注曰沔水無西入之理劉澄之云有水從阿陽縣南  
至梓潼漢壽入大穴暗通岡山郭景純亦言是矣岡  
山穴小本不容水水成大澤而流與漢合庾仲雍又  
言漢自武遂川南入葭葛谷越野牛逕至關城合西  
漢水故諸言漢者多言西漢水至葭萌入漢錐指曰  
以今輿地言之秦州西和禮縣成縣畧陽寧羌廣元  
昭化劍州蒼溪閬中南部蓬州南充定遠合州巴縣  
諸界中皆西漢水之所經也又曰嘗試以圖志考之

漾沮雖有枝津與西漢通要皆自東入西非自西入東也蓋嶠冢亘絕東西俗謂之分水嶺地勢東高而西下故西漢水自畧陽縣南入寧羗州界卽折而西南避高就下其性則然豈有東入之理澄之所言卽禹貢之潛仲雍所言卽通谷水也二水皆通漢之枝津西流入西漢水而說者乃謂西漢至葭萌入漢顛倒之矣今嶺東漾沮枝津皆入西漢嶺西溪澗之水亦皆入西漢川流去來有目者盡能驗之其可是古而非今乎王阮亭驛程記曰寧羗州行十里渡水通

百牢關關下有分水嶺嶺東水皆北流至五丁峽北合漾水入沔而爲東漢嶺西水皆南流逕七盤關龍洞合嘉水而爲西漢

蟠冢山錐指曰山海經漢水出鮒嶠山蓋蟠冢之異名也本在漢中郡沔陽縣界後魏正始中析沔陽置蟠冢縣屬華陽郡故地形志云其縣有蟠冢山隋省沔陽入蟠冢屬梁州大業初改置西縣故隋志云西縣有蟠冢山唐武德分利州綿谷縣之通谷鎮置金牛縣而山入其境故括地志云蟠冢山在金牛縣東

二十八里通典云金牛縣有嵯豸山四年又分綿谷置三泉縣寶歷初省金牛入三泉故寰宇記云嵯豸山在三泉縣東宋至道二年升三泉縣爲大安軍紹興三年改建軍於西縣界復置三泉縣隸軍故輿地紀勝引宋朝郡縣志云今之言漢水以西縣之嵯豸山爲源後又省三泉入軍故地理通釋云嵯豸山在大安軍西元降軍爲縣故大一統志云漢水源出大安縣嵯豸山明初以其地改置沔縣又於縣西南置寧羌衛成化二十二年卽衛置州而山入其境故漢

中府志云嶠豕山在寧羗州北九十里蓋此山本在漢沔縣界西南接葭萌自後魏以來言山之所在曰嶠豕曰西縣曰金牛曰三泉曰大安曰寧羗地名六變而山則一皆在古梁州之域其爲禹貢之嶠豕無疑也又曰嶠豕山孔傳不言所在之郡縣而正義引地理志以實之云隴西郡西縣嶠豕山西漢水所出夫此水卽嘉陵水之上源非禹貢之所謂嶠豕導漾東流爲漢者也而班固以西縣之嶠豕爲禹貢之嶠豕謬矣自是以後言嶠豕者率依班氏如張衡西京

賦云終南太乙連岡乎蟠冢潘岳西征賦云面終南而背雲陽跨平原而連蟠冢玩其辭意皆主隴西而言司馬彪郡國志亦云漢陽郡西縣有蟠冢山無異議也自後魏正始中析沔陽地置蟠冢縣以表其山而名始著酈道元卒於孝昌二年上距正始置縣之時凡二十餘歲本朝典故生所親見而注水經則不言豈事在成書之後不及追改抑亦因其晚出而疑之乎然漾水注引漢中記曰蟠冢以東水皆東流蟠冢以西水皆西流故俗以蟠冢爲分水嶺作者亦似



知班志之謬而以禹貢嶠冢爲當在漢中也者不然  
於漢中記奚爲詳及隴西之山耶由此觀之則魏收  
以前已有知嶠冢在漢中者不待地形志出而後知  
也穎達未之考耶然班志雖以西縣嶠冢爲禹貢之  
山而養水則自氐道之下不言出某山自水經云漾  
水出氐道縣嶠冢山而氐道亦有嶠冢矣常璩華陽  
國志云東源出武都氐道縣漾山爲漾水而氐道之  
嶠冢且有漾山之目矣郭璞注山海經云嶠冢今在  
武都氐道縣南酈道元注水經云東西兩源俱出嶠

冢而同爲漢水則似一山跨二縣之境而在西縣者  
爲西源在氏道者爲東源矣輾轉迷惑愈久愈訛說  
經者不能出其窠臼而禹貢之瞿冢幾不可問矣西  
縣故城在今秦州西南氏道今不知所在蓋自晉永  
嘉之亂隴西沒於氏羗郡縣荒廢常璩郭璞皆云氏  
道屬武都而晉志武都縣無之則此縣之不可考久  
矣要之二縣在隴西皆古雍州域也而禹貢瞿冢乃  
梁州之山不應闌入雍域故唯魏氏所言爲得其實  
而况秦州之瞿冢與寧羗之瞿冢南北相距五六百

里也又曰漢志隴西西縣下云禹貢嶠豕山西漢水  
所出此與氐道之漾水全無交涉水經非一時一手  
作漾水篇首云漾水出隴西氐道縣嶠豕山東至武  
都沮縣爲漢水此不過依漢志氐道一條以立文唯  
加嶠豕沮縣爲不同耳其所謂漢水卽東漢亦與西  
縣之西漢全無交涉及觀下文東南逕白水葭萌閭  
中至江州入江則又確是西漢水與武都一條全無  
交涉矣首尾橫決必魏晉人所續也尋其意指蓋以  
氐道水南合濁水兩當溪歷槃頭郡東而南爲西漢

水也故酈注以爲東西兩川俱出嶓冢而同爲漢水  
又曰禹貢以嶓冢繫梁州而漢志嶓冢在雍域之隴  
西一誤也禹貢云嶓冢導漾而漢志以嶓冢所出爲  
西漢水其漾水則出氐道二誤也禹貢之潛乃漾水  
枝津西出爲西漢水而漢志西漢水出西縣之嶓冢  
三誤也漢志不言漾水出何山而水經云氐道嶓冢  
山是氐道亦有嶓冢四誤也漢者東漢之源而續水  
經者以西漢接漾水爲一川五誤也漾沔枝澤皆自  
東入西而酈注從舊說云西漢水至葭萌入漢六誤

也川流離合地上灼然可見而酈注惑闕駟之說以爲原始要終潛流或一故東西俱受漢漾之名七誤也尙書古文疏證曰西漢水可單曰漢水亦可曰漾水亦可曰沔水東漢水可單曰漢水亦可曰漾水亦可曰沮水亦可曰沔水酈道元謂東西兩川俱出嶓冢猶言各出嶓冢云爾同爲漢水猶言同名漢水云爾西漢水在西和縣源出嶓冢山西流與馬池水合此乃上邽之嶓冢在今秦州漢江源出沔縣嶓冢山東流入金州此乃金牛之嶓冢禹貢嶓冢導漾乃沔

縣之嶠豕非秦州之嶠豕也又曰唐三泉縣有三一  
義寧二年置以彭原縣西南三泉故城爲名後更名  
同川一武德四年置以山下有三泉水爲名在嘉陵  
江之西一天寶元年移於嘉陵東一里樂史所謂卽  
今縣理是也宋三泉縣有二一卽唐故治後至道二  
年建大安軍縣遂廢一重置於今沔縣東卽今大安  
驛蓋紹興三年改置大安軍於此復置縣以隸焉同  
在嘉陵江之東愚按禹貢謂嶠豕導漾東流爲漢是  
東漢水也神禹治水曰其壅塞者導之不必定溯水

源如導河自積石積石非河之源岷山導江岷山非江之源世人不察遂以寧羗分水嶺爲嶓冢山山以東之水皆東流山以西之水皆西流抑思畧陽巨流置而不問偏指一隅之水亦太迂滯矣禹貢無西漢之導漢水不必盡出嶓冢漢志謂西漢水出嶓冢山已與禹貢之文不合通典雍大紀必謂西漢出嶓冢山此牽強也卽欲附會漢志亦當在鳳縣之紫柏山山西有野羊河至兩當縣入故道水山東有沮水經畧陽沔縣合漾爲沔一山之隔兩派分流其入水之

處故道褒水尙非巨流粗可相敵且陝境自太白山而西南鳳嶺紫柏大山聯絡谿水分流皆可指爲嶺冢不必定指一山括地志謂山在金牛縣三十五里漢中志謂山在寧羗州北九十里專其山以資之於水源何據也酈善長以西漢爲漾常道將以西漢始源爲沔楊升菴以閬水爲漾皆屬附會至黃黎洲以嘉陵江爲東漢悞之又悞矣

漢水西經鳳縣嘉陵谷爲嘉陵江

水道提綱謂故道水入嘉陵谷而水經注謂南入嘉



陵谷道爲嘉陵水則犀牛江也

漢水又西南經東河驛

漢水又西南經草涼驛又南受黃花川黃花川源出大散關西經黃花縣故城又西入漢

漢水又西受安河安河源出鳳縣夫子嶺遶鳳凰山西北流入漢

卽水經注之馬鞍水亦名斜谷河

漢水又西南經鳳縣城北爲故道水

故道縣漢屬涼州武都郡

漢水又西南受魚河魚河合秦州之紅巖河入漢

卽水經注之北川水亦名小峪河

漢水又西逕兩當縣城南受下邳水

漢水又西南受永寧河

漢水又南受野羊河野羊河源出紫柏山西北經廢邱  
堡受新紅水又西受蜜蜂溝之水又西南經靈關峽入  
漢

此卽水經注之沮水枝津也沮水源出紫柏山經畧  
陽縣東一百二十里之沮水鎮爲鐸水爲黑河東南

流入沔縣爲沔水入東漢

漢水又西南經大漁關南

雍大記曰嘉陵江出大散關逕鳳縣北徽州東兩當南暑陽西遙逕入川江灘石險惡至漁關通舟楫

漢水又南受青泥河青泥河源出成縣山谷經紅石門合白水入漢

漢水又西南受淮水淮水源出秦州五泉山折而西北爲鹽官水又北受西和縣之橫水又北受禮縣刑馬山之永平水又北受栢林水又西經禮縣城南又西南爲

長道河經西和縣西北又東南經仇池山受岷峩江又東南爲犀牛江經階州東北受石碓水又東南受潭水又東受常家河又東受黑峪江又東南受九龍池水又南入漢

水經注曰今隴西西縣嶠豕山漢水所導也微涓細注若通羣歷江津而已西流與馬池水合又西南流左得蘭渠溪水次西有黎谷水次西有鐵谷水次西有石朮谷水次西有南谷水右得高望谷水次西得西溪水次西得黃花谷水又西南資水注之又西南

得石峽水口又西南合楊廉川又西南逕始昌峽又西南逕宕備戍左則宕備水自東南來西北注之左則鹽官水南入焉又西南合左谷水又西南合蘭臯水又西南逕祁山軍南雞水注之又西建安水入焉逕祁山城南又西南與夾谷合又西南逕平夷戍南又西南夷水注之又西逕蘭倉城南又南右會兩溪又南入嘉谷道爲嘉陵水又東南得北谷水又東南得武街水又東南得倉谷水又東南逕瞿堆西又屈逕瞿堆南又南合浴谷水又東合浴溪水又東南逕

濁水城南又東南會平樂水東南逕修城道南與修水合又東南於槃頭郡南與濁水合濁水出濁城東北流與丁令溪水合又東逕武街城南又東宏休水注之又東逕白石縣南又東南合涅陽水又東與仇鳩水合又東南與河池水合又東南兩當水注之愚按水經注以此水爲漢水正源然去東漢太遠中有故道水間之不應得漢名故當附諸故道水

漢水又南受橫規河

卽水經注之扶巖水

漢水又南經畧陽縣城西受八渡水八渡水源出徽縣山谷爲退水繞流一百八渡經縣城東南合飛仙嶺之夾渠水入漢

畧陽縣漢爲武都郡沮縣縣故基在今縣城東一百二十里沮水河側後魏置武興郡八渡水卽水經注之北谷水亦名黃坂水

漢水又西南受落索河

漢水又西南受黑水

漢水又西南逕陽平關受燕子河

漢水又西南受廣平河

水經注曰兩當水出陳倉縣之大散嶺西南流入故道川謂之故道水西南經故道城東與馬鞍水合又西南北川水注之又西南合廣香川水又西南入秦岡山尙婆水注之又右會黃盧水又南入東益州之廣業郡界與沮水枝津合謂之兩當水又南逕槃頭郡東而南合鳳溪又南注漢水又東南歷漢曲逕挾巖與挾巖水合又東逕武興城南又東南與北谷水合又西南逕關城北除水入之又西南逕通谷又西



寒水注之

漢水又南經朝天關受潛水潛水源出陝西寧羗州西北黃壩驛東之蔡山嶺西合斷寶水斷寶水源出斷寶山西南經七盤關又西經木寨山又西入潛潛水又南經神宜驛又西穿龍洞而出流入漢

神宜卽武侯籌筆驛唐杜牧詩云畫地乾坤在濡毫勝負知李商隱詩魚鳥猶疑畏簡書風雲長爲護儲胥謂此也龍洞有石穴高數十丈狀如門水奔注其中穿山腹而出內有二洞三洞居民常入取耐最爲

寬厥其山爲龍洞背卽梁州記之蔥嶺舊設渾毒關  
屯軍以捍蜀口郭璞爾雅注曰有水從漢中沔陽縣  
南流至梓潼漢壽入大穴中通岡山下西南潛出一  
名沔水舊俗云卽禹貢潛也括地志曰潛水一名伏  
水今名龍門水源出利州綿谷縣東龍門山大石穴  
下寰宇記曰大寒水在三泉故縣南十五里西流至  
龍門入石穴梁州志曰蔥嶺有石穴水高數十丈其  
狀如門號曰龍門

禹貢敘梁州貢道西傾因桓是來浮於潛逾於沔入

於渭亂於河蘇東坡曰沔無入渭之道漢人所言褒斜則其道也禹時通謂褒爲沔蔡仲默曰褒斜絕水百餘里於經文當日逾於渭今日逾於沔此又未可曉金仁山曰潛於渭無可通之道經當言入於沔逾於渭今本誤也愚按漢孝武時張湯欲通漕事云褒水通沔斜水通渭皆可以漕從南陽上沔入褒褒絕水至斜間百餘里以車轉從斜下渭則漢中穀可致乃拜湯子功爲漢中守發數萬人作褒斜道五百餘里道果便近而水多湍石不可漕是漢時褒斜二水

實有可通也蜀都賦注曰褒中縣南口斜谷水源在  
北南流經褒中故北口曰褒南口曰斜同一谷耳長  
四百七十里西京賦注曰褒斜在長安西南南口褒  
北口斜長四百七十里曹操謂爲五百石穴水經注  
曰自西傾而至葭萌浮於西漢西漢卽潛水也自西  
漢溯流而屈於晉壽界阻漾枝津南歷岡穴迤邐而  
接漢沿此入漾書所謂浮潛而逾沔矣歷漢川至南  
鄭縣屬於褒水溯褒暨於衙嶺之南溪水枝灌於斜  
川屈於武功而北達於渭水此乃水陸之相關川流

之所經復不乖禹貢入渭之宗實符尙書亂河之義也括地志曰褒水出縣西北九十八里衙嶺山與斜水同源而派分郿縣志曰自縣西南三十里入斜谷口二百二十里抵鳳縣西出連雲棧復一百五十里出谷口抵褒城南巖高峻谷中水南北分流卽褒水斜水也斜谷河分導縣境者爲清水河逕馬鞍山循紅巖東北流二十里入渭其東導一派曰磨渠河逕景家橋與蒼龍谷水合亦曰蒼谷水南自蒼谷北抵官村菴逕老虎溝東入乾溝河乾溝河一名五谷水

源出桐谷北流入渭據諸家之說亦實二水可通然  
沔與褒斜實爲三水由沔溯褒已難施以舟楫又况  
褒斜之交乎今故道水自廣元而上經畧陽兩當鳳  
縣一水可通但越大散關卽寶雞之渭水矣三水之  
汭沿何如一水之通貫其不免於逾山一也其不免  
於疏鑿一也而無議及之者豈古今通塞之異宜耶  
又按西傾桓水漢書曰西傾在隴西郡臨洮縣西括  
地志曰西傾山今強臺山在洮州臨洮縣西南三百  
三十里孔疏曰西傾雍州山在今洮州臨洮縣西一

百八十里洮水出其北入河桓水出其東南今名白水江夫西傾在梁州之域何以轉走梁州而迂兼水陸耶禹貢言梁州貢道則當盡梁州所有禹貢之和夷底績鄭康成讀和爲桓漢書云桓水出蜀郡蜀山西南行羌中水經謂桓水出蜀郡岷山西南行羌中入於南海然則桓水非白水也今雖未識所在大約大渡河金沙江二水當之皆入江之水故曰因桓是來水經謂入於南海亦誤也旣入南海何出入江而通貢道乎尙書疏證曰寰宇記和川路在巖道縣界

西去吐蕃河五日程從大渡河西至吐蕃松城四日程羌蠻混雜連山接野鳥路沿空不知里數說者謂卽書之和夷晉地道記梁州南至桓水疑指大渡河四川通志和夷今黎雅越嶲等處則大渡河以南今建昌衛爲宋藝祖以玉斧畫而棄之者蓋古和夷云百詩之言是也大渡河與岷江同源俱自臨洮而來而曲折迂遠乃遶梁州西南之境故足以當之若白水入漢之道甚近所漕無幾烏足辱禹貢之紀載哉西傾與朱圉鳥鼠連而言之卽謂今之嶺臺山亦可



也但不可以桓木爲白水耳禹貢舉桓木以見界則  
松茂黎嶠而外諸蠻雖神禹之德政固未有以敷之  
與

漢水又西經朝天關西南受羊模水羊模水源出階州  
山谷西南羊模壩受尾界水又西南入漢

水經注謂平阿水出東山西流入漢卽此水也俗以  
此爲廣平水非是○朝天關有嶺甚險峻文與可詩  
曰嶺若畫屏隨峽勢水如衣帶轉崑陰

漢水又南經石亭戍受沙水沙水源出廣元縣東北鳴

水洞西會漁洞水入漢

石亭戍今爲沙河驛唐之望喜驛也元微之詩曰補  
眼文書堆案前眼昏侵得暫時眠子規驚覺燈又滅  
一道月光橫枕邊鳴水洞有上下二洞上洞水貫下  
洞而出鳴聲清越

漢水又南經飛仙嶺受滌溪滌溪源出葉本山南環金  
山而右出爲雲溪又東入漢

飛仙嶺有閣蕭然三面皆絕俯臨關門有仙鶴飛起  
之形故名方輿勝覽謂在沔州東三十里鄭樵謂在

褒城縣武曲關北有棧閣五十三間非此嶺矣以名  
勝記次第考之此當爲大小漫天嶺元稹詩云五上  
兩漫天羅隱詩云爭得禁他兩度漫高駢詩云漫天  
嶺上頻回首然杜子美飛仙閣詩云土門山行窄微  
徑緣秋毫棧雲闌千峻梯石結構牢此嶺高數百仞  
突出阻漢數里之遙漢水卽緣嶺爲曲折上有佛剎  
高危欲墜今梯石由堙口而過若緣漢爲棧其險峻  
當以杜詩爲善狀飛仙嶺志家俱引唐徐佐卿化鶴  
故事然集異記神異錄俱云天寶十三載元宗獵於

沙苑見孤鶴徘徊親御弧矢中之何得在褒沔廣元之地乎又廣異記謂徐佐昭化鴈

漢水又西南經廣元縣城西南

廣元縣故葭萌地也晉太寧中分置興安縣屬晉壽郡宋武帝分置興樂縣齊永泰初分置東晉壽郡石亭縣尋廢石亭爲戍梁天監四年入魏僑置西益州大通六年還入梁分置木門郡池川縣大同中改西益州爲黎州西魏廢帝三年改黎州爲利州恭帝元年改興樂爲嘉川置宋熙郡又置義成縣隋開皇改

利州爲智州省池川入義城十八年改興安爲綿谷  
大業初改州爲義成郡義寧二年改義成爲義清唐  
武德元年郡改利州復置池川縣七年置西平州貞  
觀二年廢天寶元年改義清爲印山縣州爲益昌郡  
乾元復爲利州屬山南西道永泰元年改池川爲通  
平乾寧四年置昭武軍後唐改州爲益州宋爲利州  
益昌郡乾德元年改印山爲喬山三年改喬山爲平  
蜀屬西川路五年省通平入嘉川咸平四年分置利  
州路景祐四年改寧武軍熙寧三年省平蜀入嘉川

元省嘉川入綿谷憲宗三年置利州都元帥府至元十四年改廣元路明洪武七年改府九年改州省綿谷入之十三年復置綿谷二十二年廢綿谷改廣元爲縣屬保寧府○縣城西北倚烏奴山魏賊李烏奴敗兵於此北史曰亡命李烏奴作亂梁部陷白馬戍王元邈率車從八百人討之不克慮不自保乃使人僞降烏奴烏奴喜輕兵襲利州元邈設伏擊敗之烏奴挺身走山下皇澤寺有唐武后遺像后父士彘爲利州都督其母感漑龍而孕因生后僭位後賜刻真

客於寺中以誌降誕之地焉李商隱利州江潭詩自  
注云感孕金輪處考武后生於高祖七年乙酉至貞  
觀十二年戊戌年十四爲太宗才人永徽五年甲寅  
年三十爲高宗昭儀明年進位宸妃冊爲皇后嗣聖  
元年甲申年六十臨朝稱制垂拱元年乙酉年六十  
一寵僧懷義天冊萬歲元年乙未年七十一寵張昌  
宗張易之神龍元年乙巳年八十一崩老而彌淫可  
謂牝狐也已

漢水又南受南河南河源出棗本山釣灘巖爲釣灘水

流數里伏入穴中潛經三孔巖湧出南經漁洞峽受東西二洞之水又南受千金水又南受寬川水又南受石壁水又南受小河水又南受五道溝水又折而西經小稻壩受栢林溝水又西經大石板受金龍洞水又西經雷峯壩受泡石水又西經廣元縣城南入漢

南河一名漢壽水水經注曰漢壽水源出東山西逕東晉壽故城南而西南入於漢

漢水又西經昭化縣城東南與白水會

會處謂之桔栢津有潭深不可測唐元宗幸蜀次利



州益昌縣渡桔栢江有魚夾舟而躍議者以爲龍唐  
莊宗伐蜀王衍三泉戰敗懼毀桔栢浮梁宋乾德三  
年伐蜀蜀將王昭遠渡桔栢津焚浮梁退保劍門

昭化縣故苴國也蜀王開明尙封其弟葭萌於吐費  
城爲苴侯周顯王時蜀王攻苴苴侯奔巴巴求救於  
秦秦惠王又遣張儀司馬錯滅蜀遂滅苴置葭萌縣  
屬蜀郡漢分置白水縣屬廣漢郡蜀漢改葭萌爲漢  
壽縣屬梓潼郡魏景元四年改廣漢爲廣魏晉太康  
元年改漢壽爲晉壽太元十五年置晉壽郡又分置

晉安縣屬巴西郡安帝以晉安改屬新巴郡宋元嘉  
六年改白水縣爲平興十九年置白水郡齊永泰初  
改晉壽郡爲西晉壽梁大通六年改白水郡爲平興  
又分置東洛郡魚盤縣周復改晉壽爲益昌屬晉壽  
郡以晉安屬金還郡隋開皇十八年改晉安爲葭萌  
平興爲景谷大業三年省魚盤入景谷唐武德四年  
分置沙州方維縣貞觀元年州廢省方維入景谷寶  
歷元年省景谷入益昌後唐改益昌爲益光宋復爲  
益昌開寶五年改益昌爲昭化元初省葭萌入之明

洪武十年省昭化入廣元州十三年復置屬保寧府  
○縣城舊名黃金壩卽秦葭萌晉晉壽故治也漢曰  
東北岸土基壩則故吐費城水經注曰吐費城南卽  
晉壽城東北元和志曰晉壽故城在利州益昌縣東  
南五十里本漢葭萌縣紀勝曰益昌東南沿江有平  
田號黃金壩卽故晉壽城址○愚按漢壽縣先主都  
蜀更名在建安二十五年而建安五年曹操表封關  
壯繆爲漢壽亭侯程篁墩以爲武陵之漢壽後漢地  
理志云漢壽故索縣陽嘉二年更名屬武陵郡者是

也魏黃初三年封劉放魏壽亭侯亦卽武陵地漢制有都鄉侯都亭侯秦法十里一亭則亭侯食入十里之賦云爾唐劉夢得漢壽城春望詩自注古荊州刺史治亭其下有子胥廟兼楚王故墳夫亭在州治則指爲亭臺之亭矣然未指爲關壯繆封地也各勝記謂健爲有漢壽亭今亦無可考然亭侯但食入縣一亭之賦不必搜尋某處亭名而後封之也宋紹興中洞庭漁人獲玉印建炎二年復州賓相院伐木於大樹下土中得印慶元二年邵州守黃沃叔買得一鈕

嘉興王仲言亦有一印皆稱壽亭侯無漢字洪容齋  
謂皆非漢物後人爲之以奉廟祭者然卽後人爲之  
何以刪去漢字殆鄉愚不識地理懷疑漢時之印不  
必再稱漢而去之耶宋熊方後漢書異姓侯表亦稱  
壽亭侯而自注曰武陵王西莊十七史商榷謂傳寫  
悞脫去漢字也

漢水又西折而南受赤銅水赤銅水源出黑水塘西經  
三岔口受榜林關之水又西北受石板溪又西入漢  
任豫益州記謂葭萌縣南十里刀環山赤銅水出焉

卽此水也俗名射箭河湍急如箭故名

漢水又南受泥溪泥溪源出寨子渠南出石門峽又東受白衛溪又東入漢

白衛嶺相傳唐元宗幸蜀遇元元皇帝乘白衛過此而名由縣北牛頭山踰西樛下泥溪登嶺一徑平夷直達劍門外之七盤山唐故道也明皇命宮人歌李嶠詩爲之泣下明皇雜錄曰祿山犯順議欲遷幸帝置酒樓上命作樂有進水調歌者曰山川滿目淚沾衣富貴榮華能幾時不見只今汾水上惟有年年秋

雁飛上問誰爲此曲曰李嶠上曰真才子不終飲而罷按隋唐嘉話明皇十七事明皇傳信記皆云登華萼樓唯唐本事云登勤政樓過白衛嶺皆歌是曲漢水又南受聞溪聞溪源出州北五子山西受把寨水又南經劍州城東又東經江口入漢提綱以聞溪爲劍水悞也

劍州故梓潼地也蜀漢分置漢德縣屬梓潼郡晉分置始平郡始平縣新巴郡新巴縣宋元嘉十二年僞立武功郡下辨縣尋改下辨爲武功縣又置南安郡

南安縣齊廢漢德分南安置白水縣梁天監十八年  
分置胡原梁安二縣承聖中改南安郡爲南安州西  
魏廢帝三年廢始平縣改始平郡爲始州尋改州爲  
普安郡南安爲普安縣白水爲永歸縣後周天和中  
改梁安爲黃安武功爲武連隋開皇廢郡爲始州七  
年改胡原爲臨津大業復改州爲普安郡唐初復爲  
始州改黃安爲普成聖歷三年分置劍門縣先天二  
年改始州爲劍州天寶改州爲普安郡乾元復爲劍  
州屬建南道宋爲劍州普安郡乾德五年廢永歸熙



寧五年廢臨津隆興二年置普安軍紹興元年改隆慶府屬利州東路元至元二十年復爲劍州廢普安劍門二縣入普安屬廣元路明洪武十四年廢普安入州屬保寧府○州以大小劍山名在州西北六十里之劍門關而今治爲普安故治也州東南五十里永歸壩有永歸故城東南一百里樊池屯有臨津故城南一百四十里有黃安故城西南八十里武連驛卽武連故城東北四十五里漢陽舖有德漢故城亦名黃盧城

漢水又南經亭子山

山上有宋將軍王佐墓佐字翼願陝之天水軍人宋  
寶祐六年與楊立徐斯同守長寧山元兵由劍門攻  
取苦竹隘進圍長寧山立戰死斯佐退保鷲頂堡縣  
令王仲以城降斯佐不屈死之佐妻張氏及斯家屬  
四十餘人皆遇害

漢水又南受曲肘川曲肘川源出玉女山流爲玉水河  
入漢

寰宇記曰隋開皇四年漢昌縣移理曲肘川志曰曲

肘川東西旋折如肘之曲卽古蒼溪谷也縣以得名  
漢水又南經蒼溪縣城西

蒼溪縣故閬中地也晉太康中分置蒼溪縣屬巴西  
郡宋初省蒼溪入漢昌別置宋安縣西魏廢帝三年  
改宋安爲岐坪別置江州恭帝二年分置奉國縣改  
江州爲方州後周天和二年州廢隋開皇十八年復  
置蒼溪縣唐武德三年復置方州八年廢天寶七年  
置西平州寶歷元年省岐坪天復中復置宋熙寧三  
年省岐坪入奉國五年廢西平元至元十二年省奉國

入蒼溪屬保寧府明洪武十年省十三年復置○縣  
有離堆山在漢爲宕渠塞一名白鶴山山腰有來仙  
洞形勢突兀塞大江之流爲城北後陴顏魯公磨巖  
記謂山斗入嘉陵江而此山去江尙三里有餘其臨  
江鎖鎮水口者爲武當山

蜀水經卷之十三

京山李

漢水

漢水又南經保寧府城西南爲閬水

閬水樓鑰曰嘉陵江至閬州西北折而南趨橫流而東復折而北州城三面皆水故謂閬中地勢平濶江流舒緩城南正當佳處三巴記曰閬中有渝水寶銳氣善舞漢高祖樂其猛銳數觀其舞使樂人習之所謂巴渝舞也

保寧府漢置閬中縣屬巴郡漢建安六年置巴西郡  
宋元嘉十二年爲北巴西郡屬梁州梁天建八年改  
南梁州西魏廢帝三年改隆州尋爲盤龍郡隋開皇  
廢郡大業復爲巴西郡唐武德元年復爲隆州分置  
思恭縣七年省先天二年避元宗諱改州爲閬州天  
寶改閬中郡乾元復爲閬州屬山南道後唐天成四  
年置保寧軍宋爲閬州閬中郡乾德四年改安德軍  
屬利州路元置東川路元帥府至元十三年改保寧  
府領新得小寧二州二十年改保寧路尋復爲府二

州俱廢明成化二十三年建雍王府宏治三年王遷  
衡州四年建壽王府正德元年王遷德安○方輿勝  
覽曰唐魯王靈夔滕王元嬰皆鎮是州以衡宇卑陋  
遂修飾宏大之擬於宮苑謂之隆苑其後避明皇諱  
謂之閬苑或謂閬苑仙有五城十二樓何但有五城  
而樓尙闕宋德之爲守乃建碧玉樓於街城之西南  
隅亦名十二樓以成閬苑之勝○器物譜曰保寧府  
文廟中有宣聖篆碑二其一題比干墓曰左林右泉  
峻岡前導萬世之靈茲焉是寶其一題曰嗚呼有吳

延陵季子之墓。郤治東三十步有張桓侯廟。廟屋凡三重。最後一邱隆然。敗垣繚之。卽桓侯墓。獻賊犯城。夜見巨人坐城上。而濯足於江。遂駭遁。又府治衙神祠有銅鐘高二尺餘。其徑三分圓之一。上下無侈。弇有文云。維大周長安肆年歲次甲辰拾酉癸丑朔貳日甲寅。合州慶林觀主蒲應真等奉爲經神皇帝陛下敬造洪鐘一口。鐘重四百觔。普及法界羣生。竝同斯福。朝議郎行合州司馬德表。錦屏山在城南。漢江之南。兩岸連互。壁立如屏。四時花木錯雜如錦。



形似馬鞍又名寶鞍山宋郡守李獻卿詩謂馬鞍嶺  
上花如錦也其山四合於郡又名閬中山昔多仙聖  
遊集今祠呂純陽唐火井令袁天綱題云此山磨滅  
英靈乃絕今崩頽其半矣驛程記曰從舟中望之正  
似培塿雜樹籃簦如老翁顛髮無巖壑雲物之美定  
浪得名耳○盤龍山在城東北三里屈曲蟠繞唐貞  
觀中侯者言有王氣壑之改爲錦山上有七星臺相  
傳袁天綱占象處

漢水又北經仙穴山

山在城東嘉陵江上唐高士安隱居之所有大佛像  
有九層塔亦名大像山亦名塔子山有鼈靈墓有玉  
女搗練石有龍女洞稍北有臺星巖巖穴寬三丈深  
一丈有餘穴而非洞俗名狀元洞云宋陳文惠兄弟  
讀書於此有捧硯亭碑目曰天聖九年本路轉運使  
司馬池來遊子光侍末云君實捧硯

紀勝曰宋雍熙中閬中光聖院山下江中有龍爪灘  
出焉未幾二陳相繼爲狀元元豐間又生一灘里人  
亦以龍爪名元祐六年馬涓果擢第一按龍爪灘在

西門外其南爲白溪入江之處按閬中三陳伯陳文忠公堯叟官右僕射仲陳文惠公堯俞官叅知政事同平章事季陳康肅公堯咨官武信軍節度使俱諫議大夫陳省華之子文忠康肅兩中狀元可謂盛矣又按四川狀元唐大歷內江人范崇凱蜀人王圭璞後唐蜀人張曙宋太平興國中江人蘇易簡雍熙儀隴人李協恭端拱閬中人陳堯叟咸平閬中人陳堯咨元祐南部人馬涓政和仁壽人何臬紹興資縣人趙逵內江人張孝祥眉州人程掌壁山人馮時行慶

元簡州人許奕開禧壁山人蒲國寶紹定蒼溪人王  
樾元至正成都人文允中明正德新都人楊慎共十  
八人堯叟寅渙中三元

漢水又東受宋江宋江有二源左源出南江縣西北七  
眼洞右源出廣元縣東北棗本山合流經百丈關受百  
丈水又南經鐵山關受柏溪又東經大獲山又西南經  
白沙鎮受雲臺山之水又南經梁山關入漢

宋江亦名宋熙水亦名東遊水亦名東河水經注曰  
東水出巴嶺南歷僚中謂之東遊水西南逕宋熙郡

東又東南逕始平城東又東南逕巴西郡東又東入漢水○鐵山關明副使馮傑被鄢藍賊圍於此百戶徐旻單騎進救俱爲賊所害大獲山石城四周大小二峯屹然小峯石井出泉大峯天池瀦水爲奇險之所宋紹定中都統孫臣王堅築城守而淳祐中余玠徙閬州治此也白沙鎮在城東二十里有張儀城相傳秦時故治○雲臺山亦名天柱山亦名鳳凰山高四百丈頂方百里居蒼閬之交有四洞曰麻姑芙蓉平仙峻仙有二池曰浴丹玉魚有二巖曰松根蟠桃

張道陵學道之所也其東書巖則葛稚川讀書所居  
而巨栢尤爲奇絕中空可容四人或爲亭其側謂之  
魁栢亭

漢水又東受苟溪苟溪源出天目山東北合唐溪鹽井  
溪入漢

天目山有二洞上洞在平原潛溪無底下洞在橫巖  
空溪無際以爲天之目也石刻天目二字杜光庭詩  
曰古洞草溪微有路舊碑文滅不知年

漢水又南經南部縣城西北

南部縣故閬中地也漢初平四年分置南充國縣晉  
分置西充國縣宋改南充國爲南國縣西充國爲西  
國縣屬北巴西郡梁天監二年改南國爲南部又分  
置金匱木蘭掌天三郡西魏置新安郡後周閔帝二  
年改西國爲西水縣改金匱爲金遷郡隋開皇罷郡  
改西水爲晉城唐武德元年置新井新政二縣四年  
避隱太子諱改晉城爲晉安改新城爲新政宋熙寧  
三年省晉安入西水元省西水新井新政入南部屬  
保寧府明洪武十年廢南部十三年復置

漢水又南經離堆山

山東西有石室相傳唐鮮于仲通兄弟所鑿堂北有盤石上有九曲流杯池唐顏魯公磨巖記曰此山斗入嘉陵江直上數百尺形勝縮盡上崢嶸而下洄洑不與衆山相聯屬故曰離堆按唐肅宗乾元二年魯公以刑部侍郎爲李輔國所惡貶蓬州長史故所在多碑刻焉此碑歐陽集古錄載之稱寶應元年立於閬州者考方輿勝覽名勝記稱新政縣江岸之次大歷碑鮮于氏兩神道碑一在三教院巖上一在墓口



獎諭仲通碑亦在墓田廣安州有道院碑有雲漢閣  
碑劍州武連驛逍遙樓碑皆魯公親筆今諸碑泯滅  
無存者惟逍遙樓三大字而已若劍州鶴鳴山磨崖  
刻元結中興頌則宋紹興初知州吳玠刻潼川府  
學尊經閣下千祿字碑則府尹龍閣宇文公墓刻俱  
非親筆

漢水又南經停雲巖

巖上爲蟠龍山有洞人入之履地作鐘聲蓋空中也  
名勝記曰唐蒲景珣家於巖前爲居室人不知其巖

也呂洞賓訪之不過以瓜皮題詩於石字痕常濕隨  
擦隨現明洪武中失之按東坡集回先生過湖州東  
林沈氏飲醉以石榴皮書其家東老菴之壁與此事

正同

漢水又東南經新政縣故城南

漢水又南受西水西水源出劍州西北京兆山分水嶺  
爲京兆水東南受楊帆水楊帆水源出梓潼縣東北山  
谷西入西水二川合流南經武連故城爲小潼水又東  
南經掌天山受柘溪又南受柳池水又東南受都竹水

又東南受洩水又東經蘭登山又東南入漢

掌天山出柘木可爲良弓雖歷絲燕角弗能勝也梁  
置掌天戍于此焉蘭登山嚴君平隱處○武連故城  
今爲武連驛有種松碑輿地紀勝謂晉郭璞遺蹟碑  
刻云縣路翠武功貴縣路青武功榮武功者武連舊  
名係宋元嘉中置郭璞晉人何得預爲此語今劍州  
南至閬中西至武連道傍柏數十萬株大者合抱有  
餘如蒼龍蜿蜒夏不見日可謂青翠而疲驛如故殆  
附會也俗謂明正德州牧李壁植柏然宋有羣青之

碑想植松栢在宋以前

漢水又南經石門

石門在蓬州北六十里有石梁橫臥江中爲險元至  
正壬午龍斷其梁水由中行下有溪潭魚龍之巢穴  
昔有鮮于氏子遊學錦官偶老翁丐通家信於石門  
果有人引入見龍王覽諸怪異得藥數粒而歸服之  
壽百歲

漢水又南經蓬州城東

蓬州故安漢地也梁天監六年置梓潼郡相如縣隋

廢郡以縣屬巴西郡唐武德四年改屬果州宋寶祐六年置屬蓬州元至元十五年移州來治二十年置蓬州路後復爲蓬州屬順慶府明洪武初省縣入州  
○名勝記曰舊縣以相如名周地圖云司馬相如故宅在縣南二里地有相如坪相傳相如別業西濱漢水叢薄鬱然其基名琴臺高六尺周四十四步碑目曰有相如故宅石記陳子昂之女刺落不可讀愚按漢書司馬相如成都人何緣蓬州有相如故宅而以名縣豈貴盛後移居抑降誕舊跡耶又按蓬州後周

置本治良山唐開元中徙治大寅縣宋淳祐三年余  
玠徙治營山縣之雲山元至元十五年徙治相如縣  
卽今理也○蓬州蓬山縣以山名也大蓬山在州東  
北七十里狀若海中蓬萊方四十里上有十二峯巖  
高數十丈有透明巖亦名棲真巖道士陳知禮詩曰  
巖穿能使月出沒路險何妨雲往還有秀士巖李特  
讀書處石室刻雲屋二字有飛仙巖唐登封令應靖  
隱處有朝陽洞空濶可容數百人封塞已久萬歷中  
重開有仙馬洞靈羊洞古禪窟有雙龍池有爾朱真

人藥竈有安祿山題龕有馮覲王平論德碑有米元章書仙真事石刻所謂安祿山者宋主簿朱時敏辨非范陽反臣時先天二年反臣之祿山僅十歲也別有秀立山亦名小蓬山與大蓬山對峙多產蕙蘭芬蒲山谷拔蓬山在蓬州營山二邑之交梁嘗置綏安縣方輿勝覽謂綏山卽蓬山之始號卽葛由登仙處然峩眉縣中峩山一名覆蓬山一名綏山隋大業置嘉州綏山縣劉向列仙傳謂綏山在峩眉山西南則非大蓬山矣殆因綏安縣名附會也

漢水又折而西南受青溪青溪源出營山縣西披衣山石洞中南經南瑞鎮入漢

名勝記曰營山縣西南六十里披衣山天將雨輒有雲霧馳曳如披衣狀有池去江三十里江水浸其池亦浸江水漲其池亦漲號天生池

營山縣故安漢地也宋僑置宕渠縣太清元年分置境陽郡綏安縣又置安固縣屬伏虞郡周置蓬州隋開皇廢郡十八年改綏安爲咸安大業廢州以縣屬清化郡唐武德元年復置蓬州四年分置朗池縣開



元末改安國爲良山縣至德二年改咸安爲蓬山寶  
歷元年廢朗池良山宕渠開成二年復置朗池大中  
間復置宕渠良山宋爲蓬州咸安郡治蓬池縣乾德  
三年廢宕渠祥符五年改朗池爲營山熙寧三年省  
蓬山入營山五年省良山入伏虞建炎三年復置良  
山元至元二十年省明屬順慶府○縣自宋以前皆  
蓬州治也治東南九十里蓬山故城治東七十二里  
良山故城治南六十里朗池故城治東一百里宕渠  
故城

漢水又南受藍溪藍溪源出營山縣西衮山南經青溪口入漢

衮山亦名鳳院山中有風洞下視如井有風自下而上冷氣襲人名勝記曰山頂有鳳凰臺鳳凰棲其上  
有龍馬槽石形隱如龍鱗之狀宋郡守吳幾復詩云  
蒼石皴紋龍脊在清泉涵泳海源通

順慶府故充國縣也漢置屬巴郡初平元年移郡來  
治建安六年郡移閬中晉惠帝改屬宕渠郡宋僑置  
宕渠郡縣屬之梁大同中元年改南宕渠郡分置新

興郡新興縣西魏改新興郡縣爲清居隋開皇廢郡  
改安漢爲南充清居爲漢初大業以南充屬巴西郡  
漢初屬涪陵郡唐武德四年置果州治南充而漢初  
改屬合州天寶改州爲南充郡乾元復故屬山南西  
道大歷六年改充州十年復故蜀改永寧軍宋爲果  
州南充郡屬梓州路熙寧六年省漢初紹興二十七  
年復置寶慶三年以理宗潛邸升爲順慶府屬劍南  
東路元至元四年置東川路尋改東川府十五年復  
爲順慶二十年省漢初入南充改府爲順慶路明洪

武初復爲府○果州以縣西八里果山得名邵伯溫  
詩云果山仙果秀天香處處圓金樹樹芳謂黃柑也  
元至正八年秘書監邊速達藏書山中凡四千二百  
七十一冊愚按續漢書云和帝永元二年分閬中立  
充國縣然曹大家補漢書地理已云巴郡充國縣則  
非和帝所分矣譙周巴記云初平六年分充國爲南  
充國縣今縣北之南部相傳爲古之南充旣由充國  
分置何得指北爲南也或謂南部爲古之充國又不  
應閬中南部相距七十里而分設二縣南充西充數

百里內乃無一城竊疑南充國縣是今之南部分閬中充國二縣地而分置之所謂南者閬中之南境而非充國之南境也隋改安漢爲南充蓋在南充國之南矣府西南三十五里有漢充國城則今府亦非漢治○路史楚靈王妃巴姬國今果之南充人又蜀陳壽譙周皆邑人舊有祠墓○金泉山卽果山之足也唐貞元十年十二月十二日辰時謝寰之女謝自然白日上昇韓昌黎詩所謂輕生學其術乃在金泉山須臾自輕舉飄若風中烟也然而木石生怪變狐狸

騁妖患昌黎殊不信焉而施肩吾鄭餘慶徐光溥李  
宏鄭芳庭俱有題詠真人祠青霞觀步虛臺栖樂池  
皆傳自然遺迹又縣南五十里都尉壩有都尉墓都  
尉西充女子也代父戍以功授都尉數載歸爲嫂氏  
所嘲乃置酒邀親里會飲刳腹見肝腎以死葬厚了  
山見碧梧雜錄其年代姓氏無考夫都尉娘之奇節  
較勝謝自然而世不知何也○金泉山下有明大學  
士陳于陞墓其父大學士以勤墓在棲樂山按四川  
宰相唐左僕射南部鮮于叔明中書平章鹽亭嚴震

震從弟左僕射嚴礪宋左僕射華陽王珪左丞相廣  
安游似資州趙雄茂州謝方叔樞密院蒲江魏了翁  
蘆州李鳴復參知政事崇慶胡靖臣間中陳堯佐夾  
江李觀眉州孫忭陳去非楊椿中江薛易簡仁壽虞  
允文元中書平章成都趙世延明大學士巴縣蹇義  
劉春王應熊眉州萬安新都楊廷和內江趙貞吉井  
研陳演遂寧席書綿竹劉宇亮

漢水又南受流溪流溪源出南岷山東受虹鹿二溪虹  
溪源出崇禮市山經西充縣城西爲西溪鹿溪源出鹿

巖山爲東溪俱南經三河口入流流溪又東南受虛清  
巖之陵溪又東南受琉璃鎮之曲水又南入漢

南岷山九井十三峯漢何岷隱居之所

西充縣故安漢地也唐武德四年分置西充縣屬果  
州開禧元年分置流溪縣宋熙寧七年廢流溪紹興  
二十七年復置元至元二十七年復廢

漢水又東南受大斗溪大斗溪源出岳池縣北老君山  
西南入漢

岳池縣故墊江安漢地也唐武德二年分置新明縣



屬合州萬歲通天二年分置岳池縣屬梁州宋改屬  
廣安軍開禧三年分置和溪縣元省新明和溪明省  
岳池 國朝康熙六十一年復置岳池屬順慶府

漢水又東南受清溪清溪源出南充縣南桂花坪經溪  
頭壩入漢

漢水又東南受西溪西溪源出岳池縣西龍鳳山南受  
黃龍溪又南經關門石爲平灘石又南入漢

漢水又東南經定遠縣城東受花石溪花石溪源出岳  
池縣東山西南受和溪又西受黃溪又西入漢

名勝記謂嘉陵玉溪在其左右則此又名玉溪

定遠縣故合州地也元至元四年分州之女菁坪置  
武勝軍尋改定遠州二十四年改縣屬合州明改屬  
重慶府

漢水又東南受鹽灘溪鹽灘溪源出蓬溪縣南經浴馬  
坪東南經石橋又東南經南溪口入漢

漢水又東南渠江注之

宋咸淳九年叛將劉整計策馬鬣虎頭二山扼三江  
口以圖合州州將張珪張疑兵於嘉渠口潛師渡平

陽灘火其資糧器械越砦七十里焚其船塢由是城  
築不就

漢水又南經合州城東

合州故墊江縣也漢置屬巴郡宋元嘉中改屬寧蜀  
郡又僑置東宕渠郡西魏恭帝改東宕渠郡爲合州  
尋改合州爲墊江郡墊江縣爲石鏡縣隋開皇廢郡  
爲合州八年分置赤水縣十八年改合州爲涪州大  
業改州爲涪陵郡唐武德元年復改合州天寶改州  
爲巴川郡乾元復故屬劍南道宋乾道三年改石鏡

爲石照元至元十五年省赤水明初省石照屬重慶府○唐李陽冰州人善篆書州治有積善之家必有餘慶八字又有龍門鳳穴四字皆陽冰篆書別有篆泉竹鶴則宋嘉定間蘓唐卿所篆也志曰周元公判合州嘗與客奕有老人來觀流涎而香公驚問曰汝龍耶何以主此老人曰何以知之公曰以涎知耳忽天雷電起老人化龍泝溪而去公乃令琢方石二十四片鎮之今城內之明月街通曉橋是其處愚謂此道家之術非先生所爲也州人禮部侍郎度正朱子

門人嘗跋太極圖說曰遂寧傳者伯成未第時嘗從周子遊接其議論晦菴先生聞之令正訪其子孫而求其遺文焉周子在吾鄉時傳者嘗有書謝其所寄姤說後在永州又有書謝其所寄改訂同人說但傳之書稿無恙而周子之易說則不可復見矣今之通書本名易通則六十四卦疑皆有其說今考其書獨有乾損益家人睽復无妄蒙艮等說而亦無所謂姤說同人說者則其書之散逸亦多矣可不惜哉愚按周子於太極圖躬體力行未嘗講學故未見所謂門

人程明道伊川二先生嘗在南安問學亦未及久受業今得遂寧傅伯成故表而出之伯成皇祐六年進士知漢州時稱理學名儒○晁公武清華樓記曰合州其山龍多銅梁上接岷嶺下繞甌越屬海而止所謂南戒也水則涪水嘉陵合流城下貫江沱通漢沔引衆流入於海所謂南紀也按銅梁山石亘如梁石赤如銅故名巖鑄銅梁山三字在州南五里唐書謂在石鏡縣縣附州治故耳州東南七十里銅梁縣卽以此山名之蜀都賦外負銅梁劉孝威詩銅梁不

可攀孔德紹詩銅梁忽背飛王維詩負米上銅梁晁  
公武詩銅梁山昏空翠重石鏡水落灘聲遲蓋古之  
名山而題詠多焉楚襄王滅巴封其子爲銅梁侯今  
銅梁山下有巴子城是周武王支庶之故封也搜神  
記曰銅梁山有澤水民謂神龍不可鳴鼓其傍即便  
大雨蜀都賦所謂潛龍蟠於菹澤應鳴鼓而興雨也  
寰宇記曰銅梁山東西連亘二十餘里山顛平整環  
合諸峯此其獨秀者圖經曰山有宿雲巖方巖松風  
閣讀書堂博古齋諸勝趙伯宣之別業也中有石洞

溪丈餘二石床可坐十餘人唐間邱道人居此十餘  
年乃去碁局丹井猶存○隔江有釣魚山山四面皆  
臨水渠水經其東漢水經其西北涪水經其西獨山  
東石徑一棧峭壁懸巖最爲險絕上有天池周五百  
餘步雖大旱不涸遊人由涪水懸舟而上繞山之北  
沿西漢水而歸此遊觀之奇也宋淳祐三年余玠帥  
蜀冉璉請徙合州城於釣魚山任得其人積粟守之  
賢於十萬師玠果移守此山元憲宗九年親督諸軍  
命大將渾都海守六盤乞臺不花守青居山自引兵



由忠活渡雞爪灘至石子山督戰釣魚山下凡五關  
月不能克帝爲流石所中班師至溫湯峽而薨至元  
二年元帥按東與宋兵戰於釣魚山敗之四年總帥  
汪良臣請立砦於母德山以當釣魚之衝十五年州  
將王立以城降二十二年州始還故治

漢水又南經石鏡縣故城東

縣以石名也石屹立江水中正圓如日其下巔巖如  
雲冬出水三丈夏漲則沒矣勝覽曰西漢水在石照  
縣東百步戰國策所謂漢中之甲輕舟出於巴東乘

夏水四日而至五渚也

漢水又南涪江注之合流爲墊江

蔡松年補南北史志曰吐谷渾酋長阿豺登其國西  
疆山觀墊江源問羣臣曰此水更有何名由何郡國  
入何水長史曾和曰此水經仇池過晉壽入宕渠始  
號墊江至巴郡入江度廣陵合於海阿豺曰水尙知  
歸吾獨無所歸乎乃遣使南通於劉宋貢方物宋少  
帝封爲繞河公丹鉛錄曰古墊江卽今合州合州置  
於西魏隋煬帝改合州爲涪陵而移墊江之名於桂

溪今忠州墊江則古之桂溪也

漢水又南經溫湯峽

峽長五里許上有溫泉昔人迎流砌池方廣四丈許  
上翼以亭前滙爲大池懸巖作瀑布

漢水又東南經觀音峽

兩巖石壁數仞左有龍泉高二丈許深不可測洞中  
泉水潺潺三道分流謂之三分水洞巖巖然有風陰  
森不可近春夏水漲則洞口淹沒舟不敢行右懸巖  
多瀑布直注江湍半壁有蜀漢所鑿區路若棧道水

漲峽難行舟則登岸由區路出峽

漢水又東南經玉女峽

左右石巖各十餘丈巖巖如削上有一石名玉女石  
冬月水落巨石綿亘夾束江水如匣中行浪行波湛  
水天一色夏秋水漲石盤漸沒色黑浪翻最爲奇險  
漢水又東南經魚鹿峽

涪江中流出二石一狀如魚一狀如鹿亦名石門峽  
兩石聳峙江心各高數丈水分三門而下其狀因水  
漲落爲變易故有魚鹿之名猶灘頭堆之如象如馬

也上有九石岡下有牛角沱夏秋水漲舟行最險其上爲縉雲山有九峯曰朝日香爐玉尖寶塔獅子猿嘯聚雲石照蓮花唯香爐獅子爲最秀左接魚鹿峽入涪江右入江津華蓋峯達於岷江橫過二百餘里山下有泉水東西分流溫冷各異傳云黃帝合丹於此有相思巖巖產紅豆樹高數丈實如豆大赤色名相思子有相思竹形如桃釵有相思鳥巢竹樹間食宿飛鳴鵲雄相應籠其一則一隨之

漢水又東經佛圖閣下

關巉巖最高百餘丈左漢右江鑿徑一綫蜀漢都護李  
嚴嘗欲穿城後山自汶江通水入巴江使城爲洲卽  
此地也

漢水又東南經重慶府城東入江

華陽國志曰漢世郡治巴水水北有柑橘官今北府  
城是也三巴記曰閬白二水曲折南流如巴字故名  
巴江水經注曰漢水合涪水東南至江州入江卽庾  
仲雍所謂涪內水也宋書曰高祖伐蜀謀以大衆從  
外水取成都疑兵出內水乃令臧熹朱林於水中使

羸弱乘高艦十餘由內水向黃虎朱齡衆軍從外水  
倍道兼行杜詩注曰自渝至合州者謂之內江自渝  
經瀘戎上蜀者謂之外江按內江匯漢白涪梓渠五  
源之水歸合州而合流漢志以漢爲經流而涪水逼  
近會城晉漢用兵多出之故庾仲雍稱內水獨係以  
涪後遂稱此水爲涪江而漢名隱矣

長年云畧陽縣而上水行八十里至兩河口犀牛江  
爲西河不可行舟故道水爲東河舟行至白水江止  
二河合流入畧陽縣三河壩女河灘洞兒寺盧光坪

將軍石竈門子眼門子甲門子荷葉壩大原牛小原  
牛巴斗磧尼姑溝窄垣子徐家河槐子灘紙坊溝青  
碑石卑碑石白雀寺共八十里柳樹灣泥窩子鐵爐  
灘懸溝灘雙灘子羅多河潘家壩鸚哥石哇哇渡馬  
林溝雷灘鬼錯路兌子灘銅頂石共一百二十里高  
灘子剪刀砣翟亭溝馬家渡羊肉灘送潮灘帥家溝  
李家嘴圍磯子焦石子麥穗子羅家壩毛壩灘黑水  
灘流溪溝皂角樹皮條三灘陡漲子赤腳壩桂花園  
陽平關共一百二十里教場壩竈門子青邊河龍門



寺鯉魚灘青山溝龐家渡石龍船過海灘賴毛灘竹  
園子地達溝金剛碛千坵田砲子河高脚龍門灘觀  
音灘倒灣子木槽灘潘家壩三汉子大小二郎灘涼  
水井長連灘風廂口清灘廟對溪子共一百二十里  
小菜白灘大菜白灘羊角滙清灘對子灘福祿口魚  
盤角大灘將軍石九井九灌口橫梁灘彈子打過灘  
驚悸灘釣魚嘴左家河清原巖沙溪子鑲刀壩琥珀  
灘太廟灘小八廟烟墩石立石子鋤背灘祝灘新開  
灘三灘沙棠樹蕭家灣安樂河上峽口花石頭穿眼

石朝天關共一百二十里王家灘下峽門靜川口柿  
子灣大壩口硫磺溝新開渡鬼見愁沙河驛飛尖角  
乾龍洞梁溪灘徐家河千佛巖瓦窰灘碑亭子廣元  
縣共九十里洞兒寺南河口萬家口石包子皂角舖  
風廂大人灘李家營元灘五佛巖榆錢樹兩河口來  
佛寺桔柏渡共八十里昭化縣玉馬池臥牛石水桶  
壩龍爪灣散錢灘射箭河官灘泥溪河鬼溪灘小  
窄灘彭城壩共七十里孤舟灘斗漲子紅巖子卦溪  
河白花石天子磨大窄灘小窄灘張爺廟三溪灘龍

爪灘黃金口共一百一十里陶魁灘猪兒石羣猪灘  
江口灘共四十里胡琴灘魏灘子王家灣三官灘虎  
跳灘共七十里長連灘東灘青牛廟亂流灘祝壩灘  
香溪灘背風灘釣魚嘴羊角灘龍門灘蛇溪口石灘  
口龍會灘共一百四十里黃毛灘高橋三灣羅鍋三  
灣亭子口甘溪子小驚灣雙漩子蒲萄碛松樹壩鶴  
子巖水觀音老皮巖共一百一十里蒼溪縣塔子灣  
二郎灘萬家碛竹棍子吳子渡共九十里石板灘高  
家壩簡溪口九子灘二道寺炮巖王八灘西門灘保

寧府共八十里李家灘趙家砣馬落巖滿天星茅厠  
灘磨耳灘彭城壩共七十里崩土坎倒牽牛焦石子  
虎跳井老鴉巖連壩口桑樹壩南部縣共六十里蛇  
倒退羊子橋蟠龍驛共五十里黃連三灘紅花溪王  
婆磧猪尾箒打鼓灘新政壩共八十里泥土觀雞骨  
寺馬脊灘石鴨子深溝子立石子互里口共四十五  
里董家灘西江寺白土灘土地箒石梁沱倒掛佛李  
家灣銅鼓嶺水觀音牛毛圳州口蓬州共八十里磨  
盤灘棹子角金川罈子口立溪場金竹菴共五十五

里八字腦楠木園滿天星猴子溪獅子峯老鴉窩石  
立子羅家場黑塔溝石棺材鐵線壩班鳩溪龍門場  
共九十里新開灘雙樹壩雙流石小龍門二龍堡順  
慶府共四十里高平壩蠻子河來鳳寺郭家灘南溪  
口松林濠棗兒嶺青竹碇鷺鷥溪高岡卦才口烏木  
灘富兒巖溪頭壩老君巖洛耳灣梨鼓灘羊口灘黃  
毛灘李渡場共一百六十里土門子巴山寺臨江寺  
石馬灘黃連三灘牯牛石石鼓捶萬年倉油炸溪陶  
竹子車停漕連便溪共七十里觀音三灘烏龜三灘

鐵爐灘張家灘麻地坎教場壩魚子溪龍女寺共五  
十里清水溪石板沱打鑼灘寨子溪銅石浪新開灘  
鯊灘謝河磨盤灘源口共四十五里白鶴灘石浪灘  
鱧魚濠桐子濠定遠縣共五十里東門灘打狗溪香  
爐灘清灘浩雞骨灘南溪口共四十五里賀家溪金  
鐘溪洗油子廻龍寺共四十五里響石子龍會灘蕭  
門灘石門灘要須灘石牛欄余門鎮共五十五里石  
埡子渠河口三會灘石龍灘合州共四十五里黑龍  
灘清金灘漲水灘三塊石龍洞灘共三十五里趙金

灘源灘沙溪廟折梁灘鹽井溪牛鼻峽炭壩虬門灘  
草街子共四十五里二郎灘城岡口金剛碛白碛灘  
觀音峽毛碛灘秤杆溪共七十里土沱爛泥灣大柏  
林悅來場黑石盤仙女石漁家碛利灘雞冠灘童家  
溪石鼻子七孔子二塘灘共四十五里蹇家梁飛纜  
子鐮頭嘴慈溪口共三十五里石馬灘雙石門簸箕  
石貓兒峽紅砂磧牛角沱香國寺重慶府共四十里

### 白水

白水源出洮州東南西傾山東入武都關南

白水亦名羌水亦名強水西傾山亦名西強山亦名  
強臺山畚名羅挿普拉源泉十餘泓湧成二渠山海  
經曰白水出蜀而東南注江入江州城下郭璞注曰  
色微白濁今在梓潼白水縣源從臨洮之西西傾山  
來經沓中東流通陰平至漢壽縣入潛漢書曰白水  
出甸氏道微外東至葭萌入漢過郡一行九百五十  
里水經注曰白水西北出臨洮縣西傾山東南流與  
黑水合又東逕洛和城南入洛和水又南逕鄧至城  
南又東南與大夷祝水合又東與安昌水合又東入



陰平得東維水又東南逕陰平道故城南又東逕陰平下城北又東得僊溪水又東逕僊城北又東北逕橋頭又與羌水合羌水出隴西羌道東南流歷宕昌城又東南流歷宕婆川城東而東南注又東南陽部水注之又東南逕武街城西南又東南逕葭蘆城西羊湯水入焉又逕葭蘆城南逕餘城南又東南左會五部水又東南流至橋頭會白水白水又東合雍川水又東合空冷水又東南逕建昌郡東又東南逕白水縣故城東又東南與西谷水相得又南左合東流

水又南逕武興城東又東南左得刺稽水又東南清  
水左注之又東南至吐費城東南流注漢水明史曰  
洮州衛西南西傾山桓水出焉下流爲白水江經寧  
羌州西南亦曰葭萌水又經階州羌水合之經文縣  
東黑水流合焉

白水又東受白龍江白龍江源出岷州東南分水嶺東  
受荔川又東受臨江又東受武都水又東入白水

白水又東南受清江又東受朝陽水又東受東川又東  
經階州城南受北谷河又東南受紫水又南經臨江驛

又東南受紫泥水

白水又南受乾溝水又南經玉壘關受毛家河毛家河源出文縣西山中東受馬日水又東受立智水又東經文縣城南又東受西番水又東南入白水

白水又南經白水縣故城東受西谷水西谷水源出碧玉山爲杲陽河東受孔溪又東受金殿河又東爲靈寶河入白水

西谷卽景谷也利州景谷縣本漢白水縣屬廣漢郡宋爲平興縣隋改景谷因縣北景谷爲名魏景元初

鄧艾侵蜀自陰平由景谷道徬入唐大歷十四年吐蕃入寇分道趨扶文掠方維白壩建中初復寇西川詔東川兵自江油趨白壩與山南兵合擊破之白壩卽故城南白水鎮唐書曰景谷西北有白壩鎮

白水又南經木馬山

俗名大高山下臨白水巖巖岧泐半欲覆河巖頂有古木橫懸俗謂之魯班峽名勝記謂孔明造木牛流馬處按建興十年孔明休士勸農於黃沙作木牛流馬圍祁山始以流馬運出斜谷始以流馬運其巧思

便於陸運矣而後世無遵行之者豈謂其特行數十里羣行二十里載多而行少耶

白水又南經平興縣故城

俗名三堆壩江中三石堆下有平溪水自平武縣東北菁青山流出入白水

水經注曰水南經武興城東考武興城綱目集覽謂今漢中沔縣禹貢錐指謂今畧陽縣治然則武興臨嘉陵江不臨白水也梁張齊與魏元景隆戰於葭萌大敗魏兵遂圍武興魏遣傅豎眼救之張齊退保白

水若據水經則武興在白水之南齊當進攻白水非  
退守矣疑武興卽平興之訛自白水至清水中間山  
峽逼迫無置城處獨三堆壩甚爲寬夷有城郭之勢  
殆古平興治也

白水又南經馬鳴閣

相傳孔明遣將陳式拒曹操處今名粗石棧按孔明  
遣陳式定武都陰平二郡在後主建興七年此地久  
屬蜀漢無庸拒曹也

白水又南與清水會清水源出平武縣西摩天嶺東南

受啼孤水又東受燕子溪燕子溪源出燕子巖北會樓  
子水西經七口入清清水又東南受鴈門壩之蔡溪  
又東南受魚石洞之梭溪又東受奇溪奇溪有二源一  
出泡麻池南流爲魚洞河一出龍子溪南經鵝掌壩合  
流又南經手板巖入清清水又東受劍溪劍溪源出劍  
州漢陽故城北衆溪淮流經大劍山穿劍門而出北流  
爲漁子溪又北經瀑布巖受小劍溪又北經小劍戍入  
清清水又東經益昌縣故城又東受富水又東南注於  
白水

水經注曰庾仲雍言清水自祁山來合白水斯爲孟浪也清水出自平武郡東北屬累亘下南經平武城東屈逕其城南又南歷平洛郡東南屈而南逕南陽僑郡東北又東南逕新巴縣東北又東南逕始平僑郡南又東南逕小劍戍北東南注白水寰宇記曰清水出啼狐山濶五丈自青川縣東南入利州其水清美亦曰啼狐水按啼狐水今美其名曰醍醐

大劍山在劍州東北六十里小劍山在大劍西北三十里卽蜀漢之大劍戍小劍戍也大劍山峭壁百丈



橫亘百餘里峯巒鋒稜森然劍戟故以劍名兩山峩  
巒中開一徑故以門名壁無寸土不生草木望若城  
垣天下之至險中有小溪由大劍穿小劍而出亂磴  
錯雜於溪底雖猿猴不能躍而越也溪旁綠壁爲徑  
羊腸一線曲折陂陀漢永平中司隸楊厥鑿而廣之  
然猶馬不竝驅人不旅行故左思賦曰一人守隘萬  
夫莫向張載銘曰一人荷戟萬夫趑趄李白詩曰一  
夫當關萬夫莫開華陽國志謂梓潼郡有劍閣道三  
十里至險蓋漢時道出小劍今則道轉七里坡矣蜀

漢初置閬尉守之姜維於此拒鍾會會別走陰平道  
遂滅蜀李特至此喟然而嘆曰劉氏有如此地而面  
縛於人豈不奴才乎然秦符堅使楊安伐蜀其將楊  
成破二劍固知固國之道在德不在險也閬下有誌  
公寺因寶誌傳有皖水劍山之語其實在鳳陽府定  
遠縣之劍山寶誌未嘗入蜀

魚石洞在魚盤縣故城東洞口有大池環之水自池  
湧出產嘉魚梁置魚石洞戍大寶初楊乾運攻楊法  
琛於平興法琛退保魚石洞

白水又東入漢

漢晉大道出陽平關入蜀緣白水東岸行渡清水經小劍成西南由劍溪古石牛道入蜀故漢公孫述使將軍侯丹開白水關劉璋使楊懷高沛守關頭蜀先主起館舍築亭障從成都至白水關四百餘區唐志亦云小劍鑿石架閣隘不可越也白水劍溪石巖之上在在有圓孔徑一二尺深數尺相距各丈餘皆棧閣故迹橫梁鋪板謂之棧飛樓架屋謂之閣是以風雨可避巖巢無阻蜀漢行師向以車馬而孔明木牛

流馬之運亦於是取焉今川境橋梁尙循棧閣之制而路則登不厭高緣不厭狹非獨無閣抑且無棧行人有崎嶇之歎然棧閣之制難成易朽其道繞山爲迂懸空爲險干戈之變焚燒無遺固不如今路也棧閣憑虛而立千梁無柱而孔明與兄瑾書謂一頭入山腹一頭立柱於水中則蜀以前固有柱與戰國策謂秦棧道千里通於蜀漢故張良說漢王燒絕棧道是棧制起自三代明宏治開斜谷至鳳州棧閣二千九百八十二間版閣二千八百九十二間是明中葉

尙有其制